

Kor Sukarelawan Siswa/Siswi Polis (SUKSIS) Universiti Malaysia Pahang (UMP) baru-baru ini telah menyertai cabaran Ekspedisi Berakit Antarabangsa Sungai Pahang 2009 anjuran Kerajaan Negeri Pahang pada 23 hingga 29 Mei 2009 yang lalu dari Temerloh ke Pekan, Pahang.

Kor SUKSIS UMP berjaya menjulang nama UMP dengan menduduki tempat kedua anugerah Mat Kilau kategori institusi pengajian tinggi awam (IPTA) dengan membawa pulang wang berjumlah RM1,000, cenderamata dan juga sijil penyertaan.

Kebawah Duli Yang Maha Mulia Tengku Mahkota Pahang, Tengku Abdullah Sultan Ahmad Shah berkenan mengurniakan hadiah kepada para pemenang.

Ekspedisi tersebut diketuai oleh Pegawai latihan Kor SUKSIS, C/Insp. Ismail Abdullah dan disertai dua orang jurulatih serta enam orang anggota.

Latihan intensif menggunakan rakit sebenar telah dilakukan di Sungai Jin, Sungai Lembing dari 21 hingga 22 Mei 2009.

Cabaran demi cabaran dan pelbagai halangan dilalui peserta. Pada hari pertama ekspedisi, peserta didedahkan dengan pengalaman untuk menyesuaikan diri dengan suasana sebenar cabaran menyusuri sungai Pahang di mana ekspedisi dilaksanakan secara santai bermula dari Temerloh ke Kuala Triang dengan jarak perjalanan sejauh 24 kilometer dan diikuti pada hari kedua dari Kuala Triang ke Chenor sejauh 27 kilometer.

Manakala ekspedisi pada hari ketiga pula merupakan cabaran yang paling mencabar iaitu sejauh 56 kilometer dari Chenor ke Salong.

Akhirnya, Kor SUKSIS UMP telah berjaya mendapat tempat kelima belas dengan membawa pulang sebuah hamper.

Ekspedisi pada hari keempat pula adalah sejauh 44 kilometer dari Kampung Salong ke Kampung Ganchong.

Manakala pada hari terakhir, peserta terpaksa melalui banyak cabaran dan halangan beting pasir serta rumah pam pasir sejauh 27 kilometer dari Kampung Ganchong ke Esplanade Pekan.



Kor SUKSIS UMP cipta nama di Ekspedisi Berakit Antarabangsa

